

上清道類事相卷之二

苑

大唐陸海羽客王懸河修

樓閣品下文仙堂中有七寶莊舍

洞神經云蓬萊山有金樓閣高六百四十里
內音云登陞樓之上八望三界之鄉大洞玉
訣云列金門於太素丹樓大洞玉經云太元
在空洞之表太素在幽玄之上九空列金門
於太素之天丹樓脊十重於太元之庭也太
一洞真玄經云飛闕天道寶殿之間內有金
房中有太真號曰天皇玉經云諸受仙真玉
錄者皆登此金華之樓也大洞真經云曾樓
萬里三氣成煙玉闕虛靜丹門幽深金輝玉
櫃符籍五篇又云有帝圖於紫府刊仙名於
金閣洞真經云有太一金閣七星移度經云
北帝落死南闕注生東華金闕得上我名無
窮之願與我齊并紫度矣光經云骨命以定
玄閣錄字已有生名仙籍故也太一金真記
引素靈玄洞經曰上皇太帝君王尊陛下乃
上登清靈宅太虛之闕丹城紫臺長綿玉樓
太微之觀上開九天之門請諸九天之真太

上三老君北極諸真及八海大神下命五嶽

名山諸得仙者靈尊萬萬並會于寥陽之殿
共集議天下萬民之罪福記諸吉凶學道勤
懈也飛行羽經上序云陽明星上有青城玉
樓據斗真人號曰九晨君也陰精星有五色
玉樓攀魁真人號曰北上升君也真人星上
有黃臺玉樓真人玉樓真人號曰仙華晨君
處之玄冥星有朱臺玉樓步斗真人號玄上
飛蓋晨君處之丹元星有素臺金樓躡紀真
人號曰金剛七晨君處之北極星有玄臺王
樓步綱真人號曰北辰飛華君處之天關星
有九層玉樓乘龍真人號曰總靈九元北蓋
晨君處之輔星有紫氣玉樓遊行三命真人
號曰帝尊九晨君處之洞神經云覽觀元化
人累劫曾息樓千年計復起畢竟無終休五
勝符云東勝之符秘於玄瑤青林之樓紫丘
蘭瓊之室九華真妃曰遠升辰樓飛星擲光
本行經云宵那國王有百口登樓也洞玄經
云紫微長樓在天上天中內音書其上洞真
經云金華樓仙真玉錄在其中洞玄經云玄

都長樓皇曾天中內音書其上又內音玉宇

下云九層之樓結雲氣而成在太黃翁重之
夫亦有內音在其中大洞玉經三十九章太
清天中有金華樓諸受仙真玉錄者皆在此
也八素真經云玄名碧書早刻瓊閣又云九
宮之中唯有太玄玉書金閣也又云九宮之
中住有太玄符金書玉宇上經云骨命已定
於玄閣錄字已有生名仙籍故八素陽詩九
章云玄臺結九閣丹排落翠精道學傳云陶
弘景字通明魏郡人也明帝時樓憇鍾嶺隱
居更造樓深自潛匿以修道也又云荊州長
史柳悅啓割城西樓霞樓下羅含章臺為國
家造館留梁州晉壽人王僧鎮為館主也宋
世宗明皇帝開嶽以禮真命築館以招幽逸
乃鑽峰構宇刊石載基偉柱榭於霞嶽架椒
樓于煙壑風閣舒鳳月戶懷仙求道望於海
隅簡素德以居之也又云王道憐彭城女人
也志願出家乃入龍山貨質衣資自造館宇
名曰玄曜重閣連房不日而就壯而其速有
若神助也南嶽夫人內傳云太極已往夫人

之名東華之閣丹文錄籍應為紫虛元君也
趙文和傳有七寶樓閣也

仙房品

本相經云仙房者道士服氣之室也趙文和
傳有四鎮房舍案九華經云琅軒朱房內上
德煥絳霞太具科上云有陰仙房又有青昇
房萬福房皆天師教化處太具科下云有七
寶華房高上太具居之王晨明鏡經云有金
華洞房三素元君坐之大洞真經云有無名
之房大洞真經在其中真人八素陽歌有玄
丘房今受當仙之人上清經有素珠之房玉
晨道君居之又有積霄房扶桑大帝君居之
道迹經云此房在八浮山上清之境三元布
經云元始天王於太霄雲房以上真玉檢下
授三天玉童也又云九曲丹房上元君主之
大洞唯一篇目云讀帝君隱書於三素洞房
也道迹經云聆觀七曜房朗朗亦冥冥靈寶
隱語云景霄仙人披九玄之房駕三色之雲
更生法輪之門靈寶隱語又云披長夜之戶
明九幽之房度身之界進入寂庭也登真隱

訣有玉清琳房玉札紫文在其中也元始五
老赤書玉篇云天尊引衆真人九光華房也
大洞玉訣曰三華之房在玉清之內陽安元
君之所處也又云三元元君入流逸之房也
茅君內傳云白玉龜山有朱紫之房西王母
處之太上黃素方白赤氣之王八五道之玉
房也大洞玉訣云崑崙山一曰積石瑤房王
子年拾遺記云崑崙山南有丹容雲房望之
如丹霞也洞玄經云通真房在皇崖天中內
音書在其內又云玉房五老寶經及十二願
玄母八門三十九章經藏其內素靈房三九
素語玄丹止化三具洞元之道藏其內金房
太微天帝君秘九丹上仙之所元始五老又
秘五篇真文於其內金華紫房五老秘文藏
其內朱映房化應天王治其內九曲房液黎
答怒天王治其內也洞真經云瓊房高上玉
帝藏金玄羽章萬神隱音藏其內三華房在
玉城內陽安元君之所處中書律云七映紫
房上道寶經藏其內也內音第三云天有七
映之房道君所都也太玄都中宮女青律文

云上真寶符藏於高上七映朱房瓊琳紫戶
也登真云此房在上清壇南嶽夫人傳云若
俗中讀大洞真經者則三官北帝微亂其音
不得聲參紫極之靈房也又云方諸青童歌
曰瞻觀七曜房朗朗亦冥冥也又云清虛真
人歌曰解襟幄房裏神鈴鳴借瓊登真隱訣
第一有玉宇洞房上清中真品經在其內也
三元真一經云玄丹洞房道訣隱其內也三
元玉檢經云紫煙運霄軒乘風蕩玄房又云
靈都北房有天書玉宇方一丈也玉光八景
經云玉寶瓊房玉光八景經封其內金根經
云九老仙都之房上清內觀上法封其內大
有經上云素靈房中三九素語秘在其中又
云金華洞房大洞真經在其中太一帝君洞
真玄經云太上六合紫房之內太丹隱書在
其中南極元君主之三元布經又云雌一洞
房三素元君在其中又云金華雌一洞房所
在也玉清隱書云金華房太微天帝君閉居
之處也又云上元禁君超玉虛之天啓五真
之房也又上皇玉帝君云寢晏願緣房飛步

考玉京也又云上皇玉帝時時於瓊華之房
又命太微帝君使坐引萬靈於房軒散香華
於玉室陳天鈞之廣樂又云瓊霞房者上皇
玉慧玉清隱書金玄隱玄羽經在其內玉經
注云元虛黃房其長仙君所治處也登真隱
訣引蘇君傳云北極紫房上帝尊神之房也
又有玉霄琳房在玉清之境也又有丹微房
在上清西玉母所居又云靈射丹闕黃房在
上清境方諸東華山上青童君所居真誥第
二紫清內官傳妣玉觀香歌云駕欽遊八虛
徊學東華房阿母延軒觀明嘯躡雲風又紫
微夫人歌曰列坐九靈房叩歌吟太無真誥
甄命第四云方諸宮東華上房有靈妃歌曲
也上清九真中經內訣云九晨帝君坐在大
極紫房也又有九天之房太上鬱儀赤文封
其內又有八景上房珠景赤童在其內於玉
晨之詞漢武內傳云紫翠丹房紫霄琳房西
玉母居之大洞經中卷玉清王呪曰遠隱上
清室羽明帝一房也又云明出窟開陰入精
六合房又云列坐震靈席混合五日房又云

鏡心丹玄照紫氣泥丸房又云榴積丹玄內
發光泥丸房大洞真經無名房大洞真經在
其內又云栢成欽生與龜臺西母登龍臺入
隱室飛舞鏤融金液留連於晨光之房撥隱
芝以薦饌拾月風以袒臍震懼散於靈郊廣
樂響乎八海天津有停徊之波八風扇神軒
之羽逸芝白欽生而促席矣文始內傳云流
雲七色之房無上真人之所居道學傳第二
云龍威丈人入洞穴於玉房之中見一素素
書字不可解也靈寶誡三十六仙內科云神
童玉女身還太素之房九亦班符上經云北
嶽恒山君注我名於紫簡之房大洞雌一篇
目云金晨以冠玉童之類煥明暢於積感之
房又云三素元君在天華之房太真科上卷
云青昇房天師朝禮處也四極明科有金華
房又有大有之房五帝神訣秘在其中又有
玄都玉房太微黃書八卷秘其中上清變化
七十四方經云南極長生司命君登玄瑤之
洞隱巖之房也又云元始寶錄秘於九折洞
房經三萬劫一傳也又云元始天尊乘碧霞

九靈流景雲與上登太空瓊臺靈紫殿黃
房之中以授南極長生元君上清變化七十
四方解形之道三元布經又云南極長生元
君未能重登玄圃金牖之房也飛行羽經上
云太上大道君登雲景之上丹靈朱房清齋
三月也飛行羽經升玄上記云上造朱房後
使萬神神州七轉七變舞天經云丹靈啓碧
室綠庭披五房又云無英落雲寶結秀玉陽
房消魔秘戶訣云太素洞經藏高上虛皇丹
房之裏也外國放品經云青童君徘徊青華
之房也亦書玉訣下云元始下元天四司真
人常以月二十九日上會高皇天太玄都玉
京黃房以朝天真也上清投詞儀云朝濟碧
海波飛輪辭綠房八街經下云金闕紫房真
皇道君玉諱藏其中衆為篇經又云中演玄
洞符垣明八山房空洞靈章云七曜煥上清
鬱儀琳琳房道迹經云黃華英房元始天王
命五老上真仙都仙公出解形之道三元布
經授南極長生司命君之所又云九玄玉房
大洞真經秘其上洞玄經云九光華房元始

天尊引衆入其內又云玄都紫房極風天中內青書其上道迹經云南極紫房上相青童君藏七星移度經於其內內音玉宇下云宛都房都監神之所治總衆真黃簡之文又云紫微宮中有神纓之童減度之戶得神纓之童一歌無量之童立得反形於三練之房身受自然之氣懼樂無窮之齡二十四生圖云時降金宵人解榜三素房大洞玉經三十九章又云三使者太上金房之名五老延日以曲照之又云上元天有五道之玉房名書仙簡入其中又後聖道君列紀云道君育氣於丹素之房金書玉宇上經云丹瑤玉房存九星之人得往其中八素陽歌九章云朝入希林宇夕宴丹微房又云玄丘房中神童神女所歌處也又云齊籟八落外高步闔闔房奔日月二景隱文云鬱儀赤文結璘黃童秘在九天之房也又云玉清隱書藏瓊瑤之房三皇經云我我皇極觀赫赫瓊林房四極明科云大洞真經三十九章秘於高上大有之天九玄玉房之內又云大有妙經秘於九天

之上大有之宮金臺玉室素靈房中也又云消磨慧經七卷藏於玉清之闕高上虛皇丹房也又云飛步天網秘在高靈玉虛紫房之內又云三天正法秘於九天之上玉清金房紫房之內又云五行秘符秘於玉京玄房也又云玉琨金增太霄隱書七聖玄紀秘於九天之上七寶紫映之房也

上清道類事相卷之二



上清道類事相卷之三

姑十

大唐陸海羽客玉樞河修

寶臺品

本相經第十六云七寶玄臺高於地上一百餘丈上下九級周匝八面級有一治各有金格玉格磬八十一枚晝夜六時自然而唱八十一音同聲而發微而踈朗其聲和雅宛利國土莫不聞聲一切衆生皆望其音又手擊奉向音而禮第十一云黃玉臺神鈴懸空自然而鳴也法輪經云若見臺館思念無量善瞻八極身與我神洞見幽微玉京山經云岩岩天寶臺光明爛流日注云天寶臺九層玄臺也昇玄第三經云八面寶臺其臺極高妙種種莊嚴善勝大士之所乘也五勝文云南勝之符秘於玄瓊之臺鳳林之丘丹霄之景又云駕龍飛騰於西華之臺謁拜帝真又云西勝之符秘於紫鳳崇臺之室又云勝于晨暉垂曜於嶺北之臺謁拜帝真又云北勝之符秘於清玄蘭幽瓊寶之臺又云玄文飄飄玄治崇臺又云中央之符秘於玉京之下崇